

靖獻遺言

一至四

口口

332

1



版

權

免

許

淺見安正編輯

靖獻遺言

京都

風月堂藏版

靖獻遺言目錄

光緒廿九年十二月廿五日購求

離騷懷沙賦

屈平

出師表

諸葛亮

讀史述夷齊章

陶潛

移蔡帖

顏真卿

衣帶中贊

文天祥

初到建寧賦詩

謝枋得

燕歌行

劉因

絕命辭

方孝孺

同會印

門七 992

日

109

靖獻遺言卷一

右共八卷

Blank manuscript page with vertical lines.

靖獻遺言卷之一

離騷懷沙賦言懷抱沙石以自沈也

楚屈平楚又楚也

平字原與楚同姓仕於懷王為三閭大夫
三閭之職掌王族三姓曰昭屈景平序其
譜屬率其賢良以厲國士入則與懷王圖
議政事決定嫌疑出則監察群下應對諸
侯謀行職修懷王甚珍之同列上官大夫
妬害其能因譖毀之懷王疏平平被讒憂

心煩亂不知所趨乃作離騷上述唐虞三
后之制下序桀紂羿澆之敗冀君覺悟反
於正道而還己也是時秦使張儀譎詐懷
王令絕齊交楚大困後儀復來楚又厚幣
用事臣靳尚而設詭辯於懷王之寵姬鄭
袖懷王竟復釋去張儀時平既疏不復在
位使於齊顧及諫懷王曰何不殺儀懷王
追儀不及秦又誘懷王與俱會武關平又
諫懷王勿行不聽而往遂為所脅與之俱

歸拘留不遣卒客死於秦而子襄王立復
用讒言遷平於江南平復作九歌天問九
章懷沙則其一也遠遊卜居漁父等篇其伸己志
以悟君心而終不見省不忍見其宗國將
遂危亡遂赴汨羅之淵懷石自沈而死傳
曰夫天者人之始也父母者人之本也人
窮則反本故勞苦倦極未嘗不呼天也疾
痛慘怛未嘗不呼父母也屈平正道直行
竭忠盡智以事其君讒人間之可謂窮矣

其志潔故其稱物芳其行廉故死而不容
蟬蛻於濁穢之中以浮游塵埃之外不獲
世之滋垢矚然泥而不滓推此志也雖與
日月爭光可也朱子曰原之為人其志行
雖或過於中庸而不可以爲法然皆出於
忠君愛國之誠心原之爲書其辭旨雖或
流於跌宕怪神怨懟激發而不可以爲訓
然皆生於纒繆惻怛不能自己之至意雖
其不知學於北方以求周公仲尼之道而

獨馳騁於變風變雅之末流以故醇儒莊
士或羞稱之然使世之放臣屏子怨妻去
婦技淚謳吟於下而所天者幸而聽之則
於彼此之間天性民彝之善豈不足以交
有所發而增夫三綱五典之重此予之所
以每有味於其言而不敢直以詞人之賦
視之也

浩浩沅湘分流汨兮脩路幽蔽道遠忽兮曾傷
爰哀永歎喟兮世溷濁莫吾知人心不可謂兮

懷質抱情，獨無匹兮。伯樂既沒，驥焉程兮。民生稟命，各有所錯兮。定心廣志，余何畏懼兮。知死不可讓，願勿愛兮。明告君子，吾將以爲類兮。

漁父辭曰：屈原既放，游於江潭，行吟澤畔，顏色憔悴，形容枯槁。漁父見而問之，曰：子非三閭大夫與？何故至於斯？屈原曰：舉世皆濁，我獨清；衆人皆醉，我獨醒。是以見放。漁父曰：聖人不凝滯於物，而能與世推移。世人皆濁，何不淈其泥而揚其波？衆人皆

醉，何不鋪其糟而歠其醜？何故深思高舉，自令放爲？屈原曰：吾聞之，新沐者必彈冠，新浴者必振衣。安能以身之察察，受物之汶汶者乎？寧赴湘流，葬於江魚之腹中，安能以皓皓之白，而蒙世俗之塵埃乎？漁父莞爾而笑，鼓枻而去。乃歌曰：滄浪之水清兮，可以濯吾纓；滄浪之水濁兮，可以濯吾足。遂去，不復與言。

朱子又叙反離騷曰：反離騷者，漢給事黃

門郎句新莽諸吏中散大夫揚雄之所作也雄少好詞賦慕司馬相如所作以為式又怪屈原文過相如至不容作離騷自投江而死悲其文讀之未嘗不流涕也以為君子得時則大行不得則龍蛇遇不遇命也何必湛身哉廼作書往往摭離騷文而反之自崦山投諸江流以弔原云始雄好學博覽恬於勢利仕漢三世不徙官然王莽為安漢公時雄作法言已稱其美比於

伊尹周公及莽篡漢竊帝號雄遂臣之以耆老久次轉為大夫又放相如封禪文獻劇秦美新以媚莽意得校書天祿閣上會劉尋按漢書尋當作莽等以作符命為莽所誅辭連及雄使者來欲收之雄恐懼從閣上自投下幾死先是雄作解嘲有爰清爰靜遊神之廷惟寂惟寞守德之宅之語至是京師為之語曰爰清靜作符命唯寂寞自投閣雄因病免既復召為大夫竟死莽朝其

出處大致本未如此豈其所謂龍蛇者耶
然則雄固為屈原之罪人而此文乃離騷
之讒賊矣他尚何說哉

司馬光曰王莽慕龔勝之名沐以尊爵厚
祿劫以淫威重勢而必致之勝不勝逼迫

絕食而死漢龔勝以名節直言著會哀帝
崩王莽秉政乞骸骨歸老鄉里

及莽既篡國遣使者即拜勝為講學祭酒
勝稱疾不應後莽復遣使者迎勝使者與
郡太守官屬諸生千人以上入勝里致詔
使者欲令勝起迎勝稱病篤使者入謂勝
曰聖朝待君為政勝對曰命在朝夕上道
必死無益萬分使者至以印綬就加勝身

勝輒推不受使者為勝子及門人等言朝
廷虛心待君以茅土之封雖疾病宜動移

至傳舍示有行意必為子孫遺大業門人
等自使者語勝曰吾受漢家厚恩上以報
今年老矣且暮入地誰豈以一身事二姓
下見故主哉因救以棺斂喪事衣周於身
棺周於衣勿隨俗語畢遂不復開班固以
口飲食積十四日死時七十九矣

薰膏之語譏焉漢書龔勝傳末云有老父
來叩哭甚哀既而曰嗟辱

薰以香自燒膏以明自銷龔生竟天未聞
天年非吾徒也遂趨而出莫知其誰未聞

有為辨之者也可不大哀歟昔者紂為不
道毒痛四海武王不忍天下困窮而征之
而伯夷叔齊深非之義不食周粟而餓死

仲尼猶稱之曰仁以為不殞其節而已况
 於王莽憑漢累世之恩因其繼嗣衰絕飾
 詐偽而盜之又欲誣誇清士以其臭腐之
 爵祿甘言諛禮期於必致不可以智免不
 可以義讓則志行之士舍死何以全其道
 哉或者謂其不能黜芳棄明保其天年然
 則虎豹之鞞何以異於犬羊之鞞庸人之
 行孰不如此又責其不詭辭曲對若薛方
 然漢末清名之士齊有薛方及莽篡國以
 安車迎方方辭謝曰亮舜在上下有巢

由今明主方隆唐虞之德小臣欲守箕
 山之節也使者以聞莽說其言不強致然
 則將未免於諂豈曰能賢故勝遭遇無道
 及此窮矣失節之徒指班固也漢竇憲以
 外戚專權後遂謀逆
和帝誅之固以為
 憲亦死獄中排毀忠正以遂己非不
 察者又從而和之太史公稱伯夷叔齊不
 有孔子則西山之餓夫誰識知之信矣哉
 朱子曰今世人多道東漢名節無補於事
 某謂三代而下惟東漢人才太義根於其
 心不顧利害生死不變其節自是可保未

說公卿大臣且如當時郡守懲治宦官之親黨雖前者既為所治而來者復蹈其迹誅極竄戮項背相望略無所創今士大夫顧惜畏懼何望其如此乎居暇日琢磨淬厲緩急之際尚不免於退縮况游談聚議習為軟熟卒然有警何以得其伏節死義乎大抵不顧義理只計較利害皆奴婢之態殊可鄙厭

又曰荀淑正言於梁氏用事之日順帝崩太子幼

梁太后臨朝太后兄大將軍梁冀用事跋扈時有地震之變叔對策譏刺貴倖為冀所忌遂弃官歸而其子爽已濡跡於董卓專命之朝范曄曰及董卓當朝爽及鄭玄申屠高爽已黃髮矣獨至焉未旬而取卿相意者疑其奔趨舍余竊商其情以為濡跡以匡時乎不然則何為及其孫或則遂為

唐衡之壻曹操之臣而不知以為非矣或

兄緄之子也緄畏憚宦官乃為或娶中常侍唐衡女後為曹操謀主而死中常侍宦者官名朱子又於答尤延之及潘叔昌書詳斷或失身之本末矣蓋剛大直方之氣折於凶虐之餘而漸圖所以全

身就事之計故不覺其淪胥而至此耳想其當時父兄師友之間亦自有一種議論文飾蓋覆使驟而聽之者不覺其為非而真以為是必有深謀奇計可以治國救民於萬分有一之中也邪說橫流所以甚於洪水猛獸之害孟子豈欺予哉

黃幹曰陳太丘送張讓宦者名父之喪人以

為善類賴以全活者甚衆前輩亦以為太丘道廣嘗竊疑之如此則枉尺直尋而可

為歟士君子行己立身自有法度有義有命豈宜以為法天地如此其廣古今如此其遠人物如此其衆便使東漢善類盡為宦官所殺世亦曷嘗無善類哉若使是真丈夫又豈畏宦官之禍而藉太丘如此之屈辱以全其身哉吾人於此等處直須見得分明不然未有不墮坑落壟者也

右因類附錄于後後皆倣此

靖獻遺言卷之一終

靖獻遺言卷之二

出師表

漢丞相武鄉侯諸葛亮

亮字孔明瑯琊人寓居襄陽隆中躬耕隴

畝時漢室衰亂四海分裂姦賊相爭涿郡

劉備者景帝子中山靖主之後也自以王

室之胄由微賤起兵以圖興復是為昭烈

皇帝後即位在荊州未得志訪士於襄陽

司馬徽徽以亮答徐庶亦謂昭烈曰諸葛

孔明臥龍也將軍豈願見之乎昭烈曰君
與俱來庶曰此人可就見不可屈致也將
軍宜枉駕顧之昭烈由是請亮凡三往乃
見昭烈因曰漢室傾頽姦臣竊命孤不度
德量力欲信大義於天下計將安出亮為
畫策而曰將軍既帝室之胄信義著於四
海百姓孰敢不箝食壺漿以迎將軍者乎
出誠如是則漢室可興矣昭烈善之亮自是
從昭烈履險竭力以相之約吳破曹遂定

荆蜀以為興復之基矣既而曹不廢獻帝
篡位僭號魏是為蜀中傳言帝已遇害於是
昭烈發喪制服遂自漢中王即皇帝位改
元以亮為丞相委國事繼昭烈討吳還于
永安病篤乃命亮輔太子禪謂亮曰君必
能終定大事嗣子可輔輔之如其不可君
可自取亮涕泣曰臣敢不竭股肱之力效
忠貞之節繼之以死昭烈又詔勅禪曰勿
以惡小而為之勿以善小而為惟賢惟

德可以服人，汝與丞相從事，事之如父。遂
崩。亮既受遺詔，奉喪還成都，禪即位。是稱
後帝。時年十七，封亮為武鄉侯，政事咸取
決焉。亮乃約官職，修法制，發教群下，以求
直言。其教曰：夫參署者，集眾思，廣忠益也。若遠小嫌，難相違覆，曠闕損矣。違覆
而得中，猶棄敝，而獲珠玉。然人心苦不能盡，惟徐元直處茲不惑。又董幼宰參署
七年，事有不至，至于十反，來相啟告，苟能慕元直之十一，幼宰之勤，渠有忠於國，則
亮可少過矣。又曰：昔初交州，平屢聞得失，後交元直，真勤見啟，誨幼宰，每言則盡，偉度
數有諫止，雖資性鄙暗，不能悉納，然與此
四子終始好合，亦足以明其不疑於直言。

也。州平，崔烈之子，偉度，亮主簿，胡濟也。以必攘除姦凶，興復

漢室為己任，既討雍闓等，定南中，建興五
年，率諸軍出屯漢中，以圖中原。臨發，上表

云

臣亮言：先帝創業未半，而中道崩殂。今天下三
分，益州疲敝，此誠危急存亡之秋也。然侍衛之
臣，不懈於內；忠志之士，忘身於外者，蓋追先帝
之殊遇，欲報之於陛下也。誠宜開張聖聽，以光
先帝遺德，恢弘志士之氣，不宜妄自菲薄，引喻

失義以塞忠諫之路也。宮中府中俱爲一體。陟
罰臧否不宜異同。若有作姦犯科及爲忠善者
宜付有司論其刑賞以昭陛下平明之理。不宜
偏私使內外異法也。侍中侍郎郭攸之費禕董
允等此皆良實志慮忠純是以先帝簡拔以遺
陛下愚以爲宮中之事事無大小悉以咨之然
後施行必能裨補闕漏有所廣益也。將軍向寵
性行淑均曉暢軍事試用於昔日先帝稱之曰
能是以衆議舉寵爲督愚以爲營中之事事無

大小悉以咨之必能使行陣和睦優劣得所也
親賢臣遠小人此先漢所以興隆也親小人遠
賢臣此後漢所以傾頹也先帝在時每與臣論
此事未嘗不歎息痛恨於桓靈也侍中尚書長
史參軍此悉貞亮死節之臣也願陛下親之信
之則漢室之隆可計日而待也臣本布衣躬耕
於南陽苟全性命於亂世不求聞達於諸侯先
帝不以臣卑鄙猥自枉屈三顧臣於草廬之中
諮臣以當世之事由是感激遂許先帝以驅馳

後值傾覆受任於敗軍之際奉命於危難之間
爾來二十有一年矣先帝知臣謹慎故臨崩寄
臣以大事也受命以來夙夜憂慮恐託付不效
以傷先帝之明故五月渡瀘深入不毛今南方
已定兵甲已足當獎率三軍北定中原庶竭駑
鈍攘除姦凶興復漢室還於舊都此臣所以報
先帝而忠陛下之職分也至於斟酌損益進盡
忠言則攸之禱允之任也願陛下託臣以討賊
興復之效不效則治臣之罪以告先帝之靈若
無興德之言則戮允等以彰其慢陛下亦宜自
謀以咨諏善道察納雅言深追先帝遺詔臣不
勝受恩感激今當遠離臨表涕泣不知所言

後出師表

亮已上前表率大軍伐魏戎陳整齊號令
明肅於是天水南安安定皆舉郡應亮關
中響震魏使將軍張郃拒之亮使參軍馬
謖督諸軍與郃戰于街亭謖違亮節度敗
績亮還漢中謂羣下曰今欲明罰思過校

變通之道於將來自今已後諸有忠慮於國但勤攻吾之關則事可定賊可死矣於是考微勞甄烈壯引咎責躬布所失於天下厲兵講武以爲後圖戎士簡練民忘其敗矣建興六年冬復欲出兵伐魏羣臣多對以爲疑亮又上表言于帝如此遂引兵出散關自是後屢出伐魏拔郡斬將數矣魏將司馬懿憚亮威名登山掘營不肯戰亮於是息民休士三年復悉大衆而出進據

武功五丈原與懿對陣於渭水之南亮以前者數出皆糧運不繼使已志不伸乃分兵屯田爲久駐之基耕者雜於渭濱居民之間而百姓安堵軍無私焉亮數挑戰至遺以巾幘婦人之服懿終畏不敢出尋亮病篤乃處分後事從容精整終卒于軍年五十四遺命葬漢中定軍山因山爲墳冢足容棺斂以時服不須餘物云初亮自表後帝曰臣成都有桑八百株薄田十五頃

子孫衣食自有餘饒臣在外任無別調度
隨身衣食悉仰於官不別治生以長尺寸
若臣死之日不使內有餘帛外有贏財以
負陛下至是訖如其言朱子曰孔明擇婦
正得魏女奉身調
度人所不堪彼其正大之氣經綸之縝固
已得于天資矣然其智慮之所以日益精
明威望之所以日益隆重者
則寡欲養心之助與為多焉亮諸事精鍊
所至營壘井竈藩籬障塞皆應繩墨嘗推
演兵法作八陣圖及其已卒揚儀等整軍
而還懿不敢偏察行其營壘歎曰天下奇

才也其治國也撫百姓示儀軌開誠心布
公道賞不遺遠罰不阿近爵不可以無功
取刑不可以貴勢免廖立李平皆有罪嘗
為亮廢及聞亮卒立垂泣曰吾終為左社
矣平亦為之發病死亮子瞻嗣爵至鄧艾
破蜀誘瞻曰若降者必表為琅琊王瞻怒
斬艾使遂戰臨陣死瞻子尚歎曰父子荷
國重恩用生何為亦策馬赴敵軍而死艾鄧
已至成都帝遣使奉璽綬詣艾降皇子北
地王謀怒曰若理窮力屈禍敗將及便當

父子君臣背城一戰同死社稷以見先帝
可也奈何降乎帝不聽謀哭於昭烈之廟
先殺妻子張張拭曰漢相傳四百餘年而曹
氏篡漢諸葛武侯當此時間關百為左右
昭烈父子立國於蜀明討賊之義不以強
弱利害二其心蓋凜凜乎三代之佐也侯
之言曰漢賊不兩立王業不偏安又曰臣
鞠躬盡力死而後已至於成敗利鈍非臣
之明所能逆睹嗟呼誦味斯言則侯之心
可見矣雖不幸功業未究中道而殞然其

扶皇極正人心挽回先王仁義之風垂之
萬世與日月同其光明可也夫有天地則
有三綱中國之所以異於夷狄人類之所
以別於廢物者以是故耳若汨於利害之
中而亡夫天理之正則雖有天下不能一
朝居此侯所以不敢斯須而忘討賊之義
盡其心力至死不悔者也方天下雲擾之
初侯獨高卧昭烈以帝室之胄三顧其廬
而後起從之則夫出處之際固已有大過

人者其治國立經陳紀而不爲近圖其用
兵正義明律而不以詭計凡其所爲悉本
太公曾無纖毫姑息之意類皆非後世所
可及至讀其將沒自表之辭則知天下物
欲舉不足以動之所養者深則所發者大
理固然也曾子曰士不可以不弘毅若侯
者其所謂弘且毅者歟孟子曰富貴不能
淫貧賤不能移威武不能屈此之謂大丈夫
夫若侯者所謂大丈夫非耶朱子曰君子

行法以俟命而已矣是理也三代以降惟
董子嘗言之而諸葛武侯言於其君有曰
臣鞠躬盡力死而後已至於成敗利鈍非
臣之明所能逆睹也程子語其門人有曰
今容貌必端言語必正非欲獨善其身以
求知於人但天理當然亦曰循之而已矣
此三言者所指雖殊要皆行法俟命之意
此外則寂寥而無聞矣

先帝深慮以漢賊不兩立王業不偏安故託臣

以討賊也。以先帝之明，量臣之才，固當知臣伐賊才弱敵彊也。然不伐賊，王業亦亡。惟坐而待亡，孰與伐之？是故託臣而弗疑也。臣受命之日，寢不安席，食不甘味，思惟北征，宜先入南。故五月渡瀘，深入不毛，并日而食，臣非不自惜也。顧王業不可得偏全於蜀都，故冒危難，以奉先帝之遺意也。而議者謂為非計，今賊適疲於西，又務於東，兵法乘勞，此進趨之時也。謹陳其事，如左。高帝明並日月，謀臣淵深，然涉險被創，危然

後安。今陛下未及高帝，謀臣不如良平，而欲以長計取勝，坐定天下，此臣之未解一也。劉繇王朗各據州郡，論安言計，動引聖人，羣疑滿腹，衆難塞胸。今歲不戰，明年不征，使孫策坐大，遂并江東，此臣之未解二也。曹操智計殊絕於人，其用兵也，髣髴孫吳，然困於南陽，險於烏巢，危於祁連，偏於黎陽，幾敗伯山，殆死潼關，然後偽定一時耳。况臣才弱而欲以不危而定之，此臣之未解三也。曹操五攻昌霸，不下四越巢湖，不成

任用李服而李服圖之委任夏侯而夏侯敗亡先帝每稱操為能猶有此失况臣驚下何能必勝此臣之未解四也自臣到漢中中間暮年耳然喪趙雲陽群馬主閻芝丁立白壽劉郃鄧銅等及曲長屯將七十餘人突將無前賓叟青卷散騎武騎一千餘人此皆數十年之內所糾合四方之精銳非一州之所有若復數年則損三分之二也當何以圖敵此臣之未解五也今民窮兵疲而事不可息事不可息則住與行勞費

正等而不及蚤圖之欲以一州之地與賊持久此臣之未解六也夫難平者事也昔先帝敗軍於楚當此時曹操拊手謂天下已定然後先帝東連吳越西取巴蜀舉兵北征夏侯授首此操之失計而漢事將成也然後吳更違盟關羽敗稱歸蹉跌曹丕稱帝凡事如是難可逆見臣鞠躬盡力死而後已至於成敗利鈍非臣之明所能逆覩也

靖獻遺言卷之二終

靖獻遺言卷之三

讀史述夷齊章自注曰余讀史記有所感而述之

晉處士陶潛

潛字淵明一字元亮○按張綬引年譜云

字則未嘗易此在晉名淵明在宋名潛元亮之

言得之矣未詳尋陽柴桑人晉大司馬侃

之曾孫少有高志遠識不能俯仰時俗以

親老家貧起為州祭酒不堪吏職少日自

解歸環堵蕭然不蔽風日短褐穿結簞瓢

屢空晏如也州召主簿不就躬耕自資遂

抱羸疾江州刺史檀道濟往候之偃臥瘠
餒有日矣道濟饋以粱肉麾而去之後為
鎮軍建威參軍謂親朋曰聊欲絃歌以為
三徑之資可乎執事者聞之以為彭澤令
之官不以家累自隨送一力給其子書曰
汝且夕之費自給為難今遣此力助汝薪
水之勞此亦人子也可善遇之在官八十
餘日歲終會郡遣督郵至縣吏白當束帶
見之潛歎曰吾安能為五斗米折腰向鄉

里小兒耶即日解印綬去作歸去來詞以
見志後以劉裕將移晉祚恥事二姓遂不
復仕所作詩辭類多悼國傷時感諷之語
云裕已篡位國號宋文帝時特徵不至卒
謚靖節徵士裕篡國後潛所著文詞不用
年號皆以甲子紀年焉韓子
蒼曰或謂淵明所題甲子不必皆義熙後
此亦豈足論淵明哉按義熙安帝年號其
末年裕弒帝尋又廢
恭帝奪位遂弒之識者謂陶潛讀史述
蓋有感而作至今猶見其人云

二子讓國相將海隅天人革命絕景窮居采薇

高歌慨想黃虞史記曰夷齊及餓且死作歌其辭曰登彼西山兮采其薇矣以暴易暴兮不知其非矣神農虞夏忽焉沒兮我安適歸矣于嗟徂兮命之衰矣○金履祥曰是歌辭怨而氣弱絕與孔貞風凌俗爰感懦夫孟所言夷齊氣象不同

歸去來辭曰歸去來兮田園將蕪胡不歸
既自以心為形役奚惆悵而獨悲悟已往
之不諫知來者之可追實迷塗其未遠覺
今是而昨非舟遙遙以輕颺風飄飄而吹
衣問征夫以前路恨晨光之熹微乃瞻衡
宇載欣載奔童僕歡迎稚子候門三徑就

荒松菊猶存携幼入室有酒盈樽引壺觴
以自酌盼庭柯以怡顏倚南牕以寄傲審
容膝之易安園日涉以成趣門雖設而常
關策扶老以流憩時矯首而遐觀雲無心
以出岫鳥倦飛而知還景翳翳以將入撫
孤松而盤桓歸去來兮請息交以絕游世
與我而相遺復駕言兮焉求悅親戚之情
話樂琴書以消憂農人告余以春及將有
事乎西疇或命巾車或掉孤舟既窈窕以

尋壑亦崎嶇而經丘木欣欣以向榮泉涓涓而始流善萬物之得時感吾生之行休已矣乎寓形宇內能復幾時曷不委心任去留胡爲遑遑欲何之富貴非吾願帝鄉不可期懷良辰以孤往或植杖而耘耔登東臯以舒嘯臨清流而賦詩聊乘化以歸盡樂夫天命復奚疑

朱子曰張子房五世相韓韓亡不愛萬金之產弟死不葬爲韓報讎雖博浪之謀不

遂橫陽之命不延然卒藉漢滅秦誅項以摠其憤然後棄人間事導引辟穀託意寓言將與古之形解銷化者相期於八紘九垓之外使千載之下聞其風者想象歎息不知其心曾面自爲如何人其志可謂壯哉陶元亮自以晉世宰輔子孫恥復屈身後代自劉裕篡奪勢成遂不肯仕雖其功名事業不少繁見而其高情逸想播於聲詩者後世能言之士皆自以爲莫能及也

蓋古之君子其於天命民彝君臣父子太
 倫大法之所在惓惓如此是以大者既立
 而後節槩之高語言之妙乃有可得而言
 者如其不然則紀遠唐林之節非不苦漢
成帝時清名之士瑯琊有紀遠沛王維儲
郡有唐林後皆仕王莽歷公卿位
 光羲之詩非不翛然清遠也唐開元中王
給事中祿山陷京師維為所擒谷炭併瘖
祿山愛其才供舊職拘於普寧寺儲光羲
太寶末為監察御史亦任祿然一名失身於
山偽官賊平並左遷貶死
 新莽祿山之朝則其平生之所辛勤而僅

得以傳世者適足為後人嗤笑之資耳
 韓愈伯夷頌曰士之特立獨行適於義而
 已不顧人之是非皆豪傑之士信道篤而
 自知明者也一家非之力行而不惑者寡
 矣至於一國一州非之力行而不惑者蓋
 天下一人而已矣至若舉世非之力行而
 不惑者則千百年乃一人而已耳若伯夷
 者窮天地亘萬世而不顧者也昭乎日月
 不足為明萃乎泰山不足為高巍乎天地

不足爲容也。當殷之亡，周之興，微子賢也，抱祭器而去之。武王周公，聖人也，率天下之賢士與天下之諸侯而往攻之，未嘗聞有非之者也。彼伯夷、叔齊者，乃獨以爲不可，殷既滅矣，天下宗周，彼二子者獨恥食其粟，餓死而不顧，繇是而言，夫豈有求而爲哉？信道篤而自知，明者也。今世之所謂士者，一凡人譽之，則自以爲有餘，一凡人沮之，則自以爲不足，彼獨非聖人而自是

如此，夫聖人乃萬世之標準也。余故曰若伯夷者，特立獨行，窮天地，亘萬世而不顧者也。雖然，微二子亂臣賊子接迹於後世矣。

朱子又記漳州高登祠曰：孟子曰：聖人百世之師也。伯夷柳下惠是也。故聞伯夷之風者，頑夫廉，懦夫有立志。聞柳下惠之風者，鄙夫寬，薄夫敦。奮乎百世之上，百世之下聞者莫不興起也。夫孟子之於二子，其

論之詳矣雖或以為聖之清或以為聖之
和然又嘗病其隘與不恭且以其道不同
於孔子而不願學也及其一旦慨然發為
此論乃以百世之師歸之而孔子反不與
焉何哉孔子道大德中而無迹故學之者
沒身鑽仰而不足二子志潔行高而迹著
故慕之者一日感慨而有餘也然則二子
之功誠不為小而孟子之意其亦可知也
已臨漳有東溪先生高公者名登字彥先

靖康間遊大學與陳公少陽伏闕拜疏以

誅六賊留種李為請宋徽宗時蔡京等蠹

受其薦引莫肯為上明言之大學生陳東

字少陽率諸生上書曰今日之事蔡京壞

亂於前梁師成陰賊於內李彥結怨於西

北朱勳聚怨於東南王黼童貫又從而結

怨於二虜創開邊隙使天下勢危如髮

伏願陛下擒此六賊肆諸市朝傳首四方

以謝天下及金人侵宋圍汴京欽宗以李

綱為留守綱親督戰力禦之金人乃來議

和李邦彥等力勸從金議綱極諫不用金

幣割地等事一依金人言時種師道帥師
入援請扼金人而殲諸河又不從及姚平
仲劫金塞金人使來責用兵違誓之故邦
彥言用兵李綱姚平仲非朝廷意因罷綱
以謝金人於是東等又與千餘人上書言

李綱奮勇不顧以身任天下之重所謂社稷之臣也陛下拔綱中外相慶而邦彥等疾如仇讐因緣沮敗綱罷命一傳兵民騷動至於流涕咸謂不日為虜擒矣罷綱非特墮邦彥等計中又墮虜計中也乞復用綱而作邦彥等且以聞外付紳師道宗社存亡在此舉不可不謹書奏軍民不期而集者數萬人搥壞登聞鼓喧呼動地欽宗乃又以綱為京城防禦使以東為士學錄東力辭以歸○高宗即位東自丹陽召至會綱又為黃潛善汪伯彥所嫉罷東又上書乞留綱而罷潛善伯彥不報時撫州布衣歐陽澈亦徒步詣行在伏闕上書極詆用事大臣高宗遂用潛善言令殺東及澈府尹遣吏召東東請食而行手書區處家事字畫如平時已乃授其從者曰我死爾歸致此于吾親食已如廁吏有難色東笑曰我陳東也畏死即不敢言已言肯逃死

綱特以國家故為之死
帶出別同邸遂與澈同斬于市東初未識識與不識皆為流涕用事者欲兵之不

為動也紹興初召至政事堂又與宰相秦檜論不合去為靜江府古縣令有異政帥守希檜意捃其過以屬吏會帥亦以讒死獄中乃得釋被擢試進士潮州使諸生論直言不聞之可畏策闈浙水沚之所繇而遂投檄以歸檜聞大怒奪官徙容州公學博行高議論慷慨口講指畫終日滾滾無

非忠臣孝子之言捨生取義之意聞者凜然魄動神竦其在古縣學者已爭歸之至是其徒又益盛屬疾自作埋銘召所與遊及諸生訣別正坐拱手奮髯張目而逝嗚呼是亦可謂一世之人豪矣雖其所學所行未盡合於孔子然其志行之卓然亦足以爲賢者之清而使百世之下聞其風者有廉頑立懦之操則其有功於世教豈可與夫隱忍回互以濟其私而自託於孔子

之中行者同日而語哉

靖獻遺言卷之三終

靖獻遺言卷之四

移蔡帖

唐太子太師顏真卿

真卿字清臣玄宗朝為平原太守初知安
 祿山將反因霖雨修城壕儲廩祿山既
 反牒真卿將兵防河津真卿遣使問道奏
 之玄宗始聞河北郡縣皆從賊歎曰二十
 四郡曾無一人義士耶及奏至大喜曰朕
 不識顏真卿作何狀乃能如是真卿又使

親客密懷購賊牒詣諸郡及召募勇士諭
以舉兵討祿山繼以涕泣士皆感憤祿山
使其黨齊先陷東京時死節臣李愷盧奕
蔣清三人之首徇河北諸郡至平原真卿
執使斬以徇取三首結帛續體棺斂葬之
爲位祭哭由是諸郡多殺賊相應共推真
卿爲盟主時真卿從兄常山太守杲卿亦
方起兵討賊會真卿自平原遣潛告杲卿
欲連兵斷祿山歸路以緩其西入杲卿乃

以謀擒斬賊將等遂散并陘之敵解饒陽
之圍於是河北響應凡十七郡同日皆歸
朝廷祿山方欲攻潼關聞之不能進而還
時杲卿起兵纔八日守備未完賊將史思
明等卒引兵至城下杲卿晝夜拒戰鄰郡
守將擁兵不救糧盡矢竭城遂陷賊執杲
卿送祿山祿山數之曰我奏汝爲官何負
於汝而反杲卿罵曰汝本營州牧羊羯奴
天子擢汝爲三道節度使恩幸無比何負

於汝而反我世為唐臣祿位皆唐有雖為
汝所奏豈從汝反耶我為國討賊恨不斬
汝何謂反也臊羯狗何不速殺我祿山大
怒縛而梟之北死罵不絕口賊鉤斷其舌
顏氏死者三十餘人繼真卿又破賊拔郡
軍聲大振平盧軍將劉客奴等遣使與真
卿相聞請自効真卿惟一子才十餘歲使
踰海詣客奴為質軍中固請留之不從尋
潼關失守玄宗出奔蜀而賊遂陷長安矣

於是太子亨即位於靈武是為肅宗真卿
自河北以蠟丸達表於靈武肅宗加官真
卿并致赦書真卿即頌下諸軍又遣人頌
於河南江淮由是諸道徇國之心益堅未
幾廣平王俶郭子儀等收復兩京天寶之末外阻
內訌子儀自朔方提孤軍轉戰逐北誓不
還顧當是時天子西走唐祚若綴旒而能
輔太子再造王室及大難畧平遭讒譖
奪兵柄然朝聞命夕引道無纖芥自嫌忠
誠精確履險冒難始終如一天下以其身
為安危者殆三十年歐陽修曰雖唐命方
永亦由子儀忠貫日月神明扶持者而李
茂朱子曰易傳及諸葛次及郭汾陽而李

光弼又屢敗思明等，賊勢大沮，而唐朝再興焉。真卿復朝爲御史大夫，方朝廷草昧，不暇給而繩治如平日，百官肅然。宰相厭其言，出之，尋召爲刑部侍郎。時李輔國方藉勢，貳間兩宮，而玄宗遂遷西內。真卿首帥百寮，上表請問玄宗起居，輔國惡之，又奏貶之。代宗自陝還也，真卿時爲尚書右丞，請先謁陵廟，而卽宮。宰相元載以爲迂，真卿怒曰：「朝廷事豈堪公再破壞邪？」載啣

之載時專權，多引私黨，恐奏事者攻訐其私，乃給請百官論事，皆先白宰相，然後奏聞。真卿上疏曰：「諫官御史陛下之耳目，今使論事者先白宰相，是自掩其耳目也。李林甫爲相，深疾言者，下情不通，卒成幸蜀之禍。陵夷至於今日，其所從來者漸矣。夫入主大開不諱之路，群臣猶莫敢盡言，況今宰相大臣裁而抑之，則陛下所聞見者不過三數人耳。天下之士從此鉗口結舌，

陛下見無復言者以為天下無事可論是
 林甫復起於今日也陛下儻不早寤漸成
 孤立後雖悔之亦無及矣載復誣貶之至
 德宗朝楊炎當國時真卿還在朝亦以直
 不容及盧杞為相益惡真卿欲復出之會
 李希烈反陷汝州德宗問計於杞杞曰誠
 得儒雅重臣為陳禍福可不勞軍旅而服
 顏真卿三朝舊臣忠直剛決名重海內人
 所信服真其人也真卿時為太子太師乃

詔遣真卿宣慰希烈舉朝聞之失色真卿
 乘驛至東都留主止之曰往必不免宜少
 留須後命真卿曰君命也將焉避之遂行
 既至欲宣詔旨希烈使兵環繞慢罵拔刃
 擬之真卿色不變希烈乃麾眾令退就真
 卿館逼使上疏雪己真卿不從真卿每與
 諸子書但戒嚴奉家廟恤諸孤訖無它語
 希烈欲遣真卿還會降將李元平在座真
 卿責之本傳云希烈使元平說真卿真卿
叱曰爾受國委任不能致命顧吾

無兵戮汝尚說我邪元平慙密言希烈留真卿不還
時朱滔等四人僭王號各遣使詰希烈勸
進希烈示之真卿曰四王見推不謀而同
真卿曰此乃四凶何謂四王公不自保功
業為唐忠臣乃與亂臣賊子相從求與之
同覆滅邪他日四使同在坐謂真卿曰都
統即希烈官將稱大號而太師適至是天以宰
相賜都統也真卿叱曰汝等知有罵安祿
山而死者顏杲卿乎乃吾兄也吾年且八

十官太師知守節而死耳豈受汝曹誘脇
乎諸賊失色希烈乃拘真卿守以甲士掘
方丈坎於庭云將阬之真卿怡然曰死生
已定何必多端亟以一劍相與豈不快公
心事邪希烈乃謝荆南節度使張伯儀與
希烈兵戰敗亡其所持旌節希烈使人以
旌節及首級示真卿真卿號慟投地絕而
復蘇自是不復言會希烈黨周曾等謀襲
希烈奉真卿為帥事洩曾死希烈乃拘送

真卿蔡州真卿度必死作遺表墓誌祭文

三文顏集不載指寢室西壁下曰此吾殯所也希

烈謀稱帝遣使問儀真卿曰老夫嘗為禮

官所記惟諸侯朝天子禮耳希烈遂僭號

遣其將辛景臻謂之曰不能屈節當自焚

積薪灌油於其庭真卿趨赴火景臻遽止

之久之希烈卒遣人殺真卿終死焉年七

十六按真卿之死本傳不書歲月綱目為

自汝移蔡為貞元元年正月據綱目則真卿死之明年乙丑歲也周曾事綱目為建

中四年癸亥三月而不載移真卿于蔡事

或恐移蔡本由曾事而其移則實明年甲子正月也然則此帖真元當作

興元傳寫之誤也姑書所疑云真卿大節

功業已偉然而立朝正色剛而有禮非公

言直道不萌於心嘗封魯郡公天下不以

姓名稱而獨曰魯公云宋祁曰當祿山反

哮噬無前魯公獨以烏合嬰其鋒功雖不

成其志有足稱者晚節偃蹇為姦臣所擠

見殞賊手毅然之氣折而不沮可謂忠矣

大節蹈之無貳色何耶彼忠臣誼士寧以
 未見信望于人要返諸已得其正而後悔
 於中而行之也嗚呼雖于五百歲其英烈
 言言如嚴霜烈日可畏而仰哉林之奇曰
 燕伐齊七十餘城皆為燕有初未聞忠臣
 義士有發憤之氣也及王蠋死節義不北
 而於燕然後齊士靡然從之七十餘城復
 為齊有燕將樂毅破齊聞畫邑人王蠋賢
 軍中環畫邑無入使人謂蠋曰
齊人多高子義吾以子為將封萬家蠋曰
 謝燕人曰子不聽吾引軍屠畫邑蠋曰忠

臣不事二君貞女不更二夫齊士不聽吾
 諫故退耕於野國既破亡吾不能存今又
 劫之以兵為君將是助桀為暴也與其生
 而無義固不如烹遂經其頸於樹枝自奮
 絕脰而死齊亡大夫聞之曰王蠋布衣也
 義不北面於燕况在位食祿者乎乃相聚
 求王子立之是為襄王遂復齊○朱子曰
 程沙隨深詆王蠋忠臣不事兩君之言竊
 疑其失將啟萬世不忠之弊夫出疆載質
 乃士之不得已曾謂以是為常耶楚漢之
 間陳平猶得多心蓋天下之人豈無忠義
 之誦况平世乎
 之心苟其艱難之際有一為倡則聞風之
 人孰不從之祿山煽亂河北二十四郡莫
 不失守及真卿首倡忠義而諸郡由是多

應然則唐室中興雖郭子儀李光弼之功而其實則真卿爲之倡也

貞元元年正月五日真卿自汝移蔡天也天之昭明其可誣乎有唐之德則不朽耳十九日書祿山旣反譙郡太守降之逼真源令張巡使迎賊巡帥吏民哭於玄元皇帝廟起兵討賊至雍丘拒賊將令狐潮力戰却之潮復引兵數萬奄至城下巡乃開門突出身先士卒直衝賊陣積六十餘日大小三百

餘戰帶甲而食裹瘡復戰潮與巡有舊於城下相勞苦如平日潮因說巡曰天下事去矣足下堅守危城欲誰爲乎巡曰足下平生以忠義自許今日之舉忠義何在潮慚而退圍守久之朝廷聲問不通潮又以書招巡巡大將六人白巡以兵勢不敵且上存亡莫知不如降也巡陽許諾明日堂上設天子畫像帥將士朝之人人皆泣巡引六將於前責以大義斬之士心益勸巡

使其將雷萬春於城上與潮相聞語未絕
賊弩射之面中六矢而不動潮疑其木人
使謀問之乃大驚遙謂巡曰向見雷將軍
方知足下軍令英然其如天道何巡曰君
未識人倫焉知天道賊苦攻數月兵常數
萬而巡衆纔千餘每戰輒克終不下賊將
襲寧陵以斷巡後巡遂守寧陵以待之始
與睢陽太守許遠相見是日賊亦至巡遠
與戰大破走之賊將尹子奇又益兵來攻

巡督勵將士晝夜苦戰擒將殺卒甚衆於
是遠謂巡曰公智勇兼濟遠為公守公為
遠戰遠位本在巡上至是授之柄而處其
下無所疑忌居中調軍糧修戰具而戰鬪
籌畫一出于巡巡所獲車馬牛羊悉分軍
士秋毫無入其家謂將士曰吾受國恩所
守正死耳但念諸君捐軀力戰而賞不酌
勛以此痛心耳將士皆激勵請奮巡乃推
牛饗士盡軍復出戰晝夜數十合屢摧敵

鋒而賊攻彌銳城中食盡襍米以茶紙樹
皮爲食士卒消耗飢疲皆不堪鬪乃更修
守具禦之賊盡攻擊之術而巡隨方打破
所爲皆應機立辦賊服其智不敢復攻於
城外穿壕立柵以守巡亦於其內作壕以
拒之時在近諸將觀望莫肯救賀蘭進明
在臨淮巡令其將南霽雲犯圍而出告急
進明嫉巡遠聲績出已上不肯出兵且愛
霽雲勇壯強留之具食作樂延之坐霽雲

恍惚語曰昨出睢陽時士不粒食月餘日
霽雲雖欲獨食義不忍雖食且不下咽大
夫坐擁疆兵曾無分災救患之意豈忠臣
義士之所爲乎因拔所佩刀斷一指通鑑
指落血淋漓以示進明日霽雲既不能達
主將之意請留一指以爲信一坐大驚皆
爲感激泣下霽雲知進明終無出師意卽
馳去又冒圍入城賊圍益急或議棄城走
巡遠議以睢陽江淮之保障若棄之去則

是無江淮也不如堅守以待救巡士多餓
死巡出愛妾曰諸君經年乏食而忠義不
少衰吾恨不割肌以啖衆寧惜一妾而坐
視士飢乃殺以大饗坐者皆泣巡彊令食
之茶紙既盡遂食馬馬盡羅雀掘鼠雀鼠
又盡至煮鎧弩以食城中知必死而莫有
畔者所餘纔四百人賊登城將士病不能
戰巡西向再拜曰臣力竭矣生既無以報
陛下死當爲厲鬼以殺賊城遂陷被執子

奇問曰聞君每督戰大呼輒背裂血面嚼
齒皆碎何至是巡曰吾志吞逆賊但力不
能耳子奇怒以刀抉視之齒所餘纔三四
巡罵曰我爲君父死爾附賊乃犬彘也安
得久子奇服其節將釋之乃以刃脅降巡
不屈又降霽雲未應巡呼曰南八男兒死
爾不可爲不義屈霽雲笑曰欲將有爲也
公知我者敢不死亦不肯降乃與遠及萬
春等皆死之巡年四十九且死起旋其衆

年傳通言卷四
同斬者見之或起或泣巡曰安之死乃命也衆泣不能仰視巡顏色不亂陽陽如平常焉初饒王巨引兵東走也巡有姪嫁陸氏遮巨勸勿行巨不納賜百緡弗受爲巡補縫行間軍中號陸家姑先巡死之巡長七尺餘鬚髯如神氣志高邁所交必大人長者不與庸俗合時人巨知也出爲清河令治績最而負節義或以困阨歸者傾貲振護無吝秩滿還都時楊國忠方專國權

勢可炙或勸一見且顯用巡答曰是乃爲國怪祥朝宦不可爲也更調真源令土多豪猾大吏華南金掛威恣肆巡下車以法誅之餘黨莫不改行爲政簡約民甚宜之其守睢陽也士卒居人一見問姓名其後無不識待人無所疑賞罰信與衆共甘苦寒暑雖廝養必整衣見之以故下爭致死力能以少擊衆未嘗敗也議者皆謂巡蔽江淮沮賊勢天下不亡其功也睢陽自

是祠享巡遠號為雙廟云文天祥題雙廟詞曰為子死孝

為臣死忠死又何妨自光岳氣分上無節君臣義缺誰負剛腸罵賊雖陽愛君許

遠留得蓋名萬古香後來者無公之標百鍊之剛嗟哉人生翕歛云亡好烈烈轟

轟作一場使當時賣國甘心降虜受人唾罵安得流芳古廟幽沈音容嚴雅枯木寒

鴉幾夕陽郵亭下有奸雄過此子細思量○接此詞文山中集不載

[Faint bleed-through text from the reverse side of the page]

靖獻遺言卷之四終

